

01. marts 2017

Inatsisartut suleriaasianni § 33 naappertorlugu Inatsisartut aalajangiiffigisassaattut siunnersuut imaattoq saqqumiuppara:

**Nuummi inissimasussamik Nunatta inuiattut timersornikkut unammersuarterfissaannik pilersaarutip FIFA-p piunasaqaataanut naapertuuttumut aningaasalersorneqarnissaannut periarfissanik misuissuisussamik suleqatigiisitamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Anders Olsen, Siumut)

**Tunggavilersuut:**

Inatsisartut 2015-imi upernaakkut ataatsimiinneranni siunnersuutigaara Nunatta inuiattut timersornikkut unammersuarterfissaannik qulisamik “National stadion”-imik pilersitsinissaq siunertaralugu Naalakkersuisut pilersaarummik kingusinnerpaamik UKA 2016-imi saqqummiunneqartussamik suliaqaqqullugit. Siunnersuut pineqartoq taamanikkut Inatsisartuni partiinit tamanit kiisalu Naalakkersuisunit annertuumik tapersorneqarpoq.

November 2016 qiteqqulluinnartoq pilersaarut pineqartoq Inatsisartunut Naalakkersuisunit agguanneqarpoq. Pilersaarut imaqarluartoq kiisalu unammersuarterfissamik sanaartornissaq sioqqullugu paasisutissanik pisariaqartinneqartunik imaqartoq sakkussatsialaasorlu taamaalilluni pigineqalerpoq.

Pilersaarummi unammersuarterfissap sanaartorneqarnissaani aningaasat tagginneqarsimasut ikigisasaanngillat, taamaattumillu sanaartornissaq pilersitsinissarlu eqqarsaatigalugit pissusissamisoorluinnartutut isumaqarfigaara arlalinnik aningaasaliisoqarnikkut aatsaat unammersuarterfissap piviusu-nngortinneqarnissaa aqqutissaasoq.

Taamaattumik siunnersuut manna aqqutigalugu Naalakkersuisut suleqatigiissitamik pilersitsinerisigut qulakkeerneqarsinnaasutut isumaqarfigaara unammersuarterfissap sanaartornissaa siunerta-

ralugu aningaalersorneqarnissaa taamatullu kingusinnerpaamik 2020-imi sanaartorluni aallartinneqarnissaa.

Nunatta inuiattut timersornikkut unammersuarterfissaa qulisaq “National stadion” Nuummi inissisimanissaa siunnersuuteqartut pingaartippara, tassami pilersaarummi pineqartumi tunngavilersuutit pingaarutillit qularnaanerpaat amerlasuutigit ersersippaat Nuummi inissisimaguni inuiaqatigiinnut pitsaanerpaajussasoq. Soorunami aamma Nuuk nunatsinni illoqarfiit pingaarnersaattut inissisimavoq inuttunerpaajullunilu, taakkuinnaalluunniimmi aamma tunngavissaqartippaatigit Nuummi inissisimanissaa qanoq pingaaruteqartigisoq.

Soorlu oqariartuutigigiga unammersuarterfissap sanaartornissaanaa eqqarsaatigalugu aningaasarpassuarnik naleqartussaana pilersaarummi takussutissiarineqarsimavoq. Taamaattumillu aningaasaliissussarsiorneq periuseralugu sanaartornissap piviusunngortinneqarnissaa avaqqunneqarsinnaanngitsutut isumaqarfigaara. Nunatta inuiattut timersornikkut unammersuarterfissaattut taagussagutsigu soorunami takorloorpara nunatta karsia aningaasaleeqataassasoq, taamatullu aamma unammersuarterfissap Nuummi inissisimanissaa eqqarsaatigalugu aamma Kommuneqarfik Sermersooq aningaasaleeqataasussatut pinissaa aamma pissusissamisoorluinnartut isumaqarfigalugit. Taakkua marluk avataasigut aningaasaleeqataasinnaasunik pissarsinissaq suleqatigiissitap pingaarnertut suliassaasa ilagilluinnaraat tamatta isumaqatigiissutigisinnaagunarparput.

Piffissanngorpoq nunatta timersornikkut nunarsuarmioqatigiit unammiaarnerinut angisuunut peqataasalernissaa, nunattalu issittumi inissisimanagera eqqarsaatigalugu “National stadion”-ip qulisaallunilu kiassagaasinnaanera pingaaruteqartorujussuusussaasut isumaqarpunga.

“Takorloorsiuk nunarput atletekimi 100 miiterimut oqilaniunnermi peqataatitaqartalersoq, takorloorsiuk nunarput 400 miiterimut oqilaniunnermi peqataatitaqartalersoq, takorloorsiuk nunarput Olympiademi unammiaarutaasartut assinginik amerliartuinnartunut peqataatitaqartalersoq, ilami aamma takorloorsiuk nunarput isikkamik arsaattartunit tusaamasanik Eng-landimiit, Frankrigimiit, Spaniamiit, Brasiliamiit Argentinamiillu tikeraarneqarluni unammiaartorfigineqartalersoq. Takorluukkat immaqa ukiorpaaluit matuma siorna piviusorsiuunngitsutut isigineqarsinnaasut maanna takorluuiunnaarluta timitaliinissatsinnut suligasuartariaqalerpugut”. Oqaatsit taakkua tassaapput 2015-imi pilersaarusiortoqarnissaanut siunnersuuteqaaqqaarama ilaatigit oqariartuutigisama ilaat.

Takorluugaanaajunnaarlutik piviusunngornissaat qangami qilanaarnannguarasi.

Timersorneq aqqutaalluni Kalaallit Nunaat nunarsuarmioqatigiinnut imminut tulluusimaarutigisoq pilersittariaqalerparput.

**Siunnersuutip aningaasatigut allaffissornikkullu pisortanut kinguneqaatissai**

Siunnersuuteqartup nalilerpaa suliaq inuup ataatsip ukiumut naammassisinnaasaa aallaavigalugu naatsorsuinermi piffissaq ukiup aappaata affaaniit ukiut marluk atorlugit naammassineqassasoq. Suleqatigiissitamut aningaasartuutissat ilimagineqarput 740.000 – 960.000 kr. Missiliussagaat, tamanna Naalackersuisoqarfimmit attuumassuteqartumit sulisut akunneranni ilaasortassaminnik toqqaasoqassappat. Suleqatigiissitamut aningaasartuutissat piffissap imaalinerani ilisimaneqanngillat Naalackersuisut aalajangissappaat suliassaq Naalakkesuisoqarfimmut toqqaananrtumik attuumassuteqanngitsunut suleqatigiissitaliussagaluarpata.

**Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai**

Soqanngilaq

**Siunnersuutip innuttaasunut allaffissornikkullu aningaasatigullu kinguneqaatissai**

Soqanngilaq